

四庫全書

集部

欽定四庫全書

集部

漢魏六朝百三家集卷一

詳校官庶吉士

臣謝恭銘

主事銜

臣徐以坤覆勘

總校官檢討

臣何思鈞

校對官編修

臣嚴福

謄錄監生

臣朱上林

欽定四庫全書

集部八

漢魏六朝百三家集

總集類

提要

臣等謹案漢魏六朝百三家集一百十八卷

明張溥編溥有詩經注疏大全合纂已著錄
自馮惟訥輯詩紀而漢魏六朝之詩匯于一
編自梅鼎祚輯文紀而漢魏六朝之文匯于
一編自張燮輯七十二家集而漢魏六朝之

遺集滙于一編溥以張氏書為根柢而取馮氏梅氏書中其人著作稍多者排比而附益之以成是集卷帙既繁不免務得貪多失於限斷編錄亦往往無法考證亦往往未明有本係經說而入之集者如董仲舒集錄春秋陰陽劉向劉歆集錄洪範五行傳之類是也有本係史類而入之集者如褚少孫集全錄補史記荀悅集全錄漢紀論之類是也有本

係子書而入之集者如諸葛亮集錄心書蕭
子雲集錄淨住子是也有牴牾顯然而不辨
者如張衡集錄周天大象賦稱魏武黃星之
類是也有是非疑似而臆斷者如陳琳傳中
有袁紹使掌書記一語遂以三國志注紹冊
烏桓單于文錄之琳集是也有偽妄無稽而
濫收者如東方朔集錄真仙通鑑所載與友
人書及十洲記序之類是也有移甲入乙而

不覺者如庾信集錄楊炯文二篇之類是也
有采摭未盡者如束皙集所錄餅賦寥寥數
語不知祝穆事文類聚所載尚多之類是也
有割裂失次者如鍾會集成侯命婦傳三國
志注截載兩處遂分其首尾各為一篇之類
是也有可以成集而遺之者如枚乘七發忘
憂館柳賦諫吳王書及玉臺新詠所載古詩
可成一卷左思三都賦白髮賦髑髏賦及文

選所載咏史詩亦可成一卷而擯落不載之類是也然州分部居以文隸人以人隸代使唐以前作者遺篇一一畧見其梗概雖因人成事要不可謂之無功也周亮工書影曰西蜀楊升菴太史著書至二百餘種豫章朱鬱儀中尉著書至一百十二種當時未聞有茂陵之求張天如雖一時名流然無多撰著當時至見于章奏求其遺書人有幸有不幸如

此云云其于溥頗致不滿今案溥所論著不出當時坊刻之習誠可付之無譏若此一編則原原本本足資檢核實遠勝其他作雖使肩隨于二人固亦無不可矣乾隆四十六年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

漢魏六朝百三家集卷一

漢賈誼集題詞

屈原為楚懷王左徒入議國事出對諸侯深見
親任賈生年二十餘吳廷尉言于漢文帝一歲
中超遷至大中大夫此兩人者始何常不遇哉
讒積忌行欲生無所比古之懷才老死終身不
得見人主者悲傷更甚即漢大臣若絳灌東陽

數短賈生亦武夫天性不便文學未必讒人罔
極如上官子蘭也太史公傳而同之悼彼短命
無異沉江漢廷公卿莫能材賈生而用也蔽于
不知猶楚諧人耳賈生治安策其大者無過減
封爵重本業教太子禮大臣數者于天子甚忠
敬于功臣宿將無不利也怒之深而遠之疾何
為乎史記不載疏策班固始條列之世謂于賈
生有功然身既踈退哭泣而死焉用文為太史

公闕而不錄其哀生者深也時政諸疏雜見新書顧倫理博通不如本疏揣摩家庭登獻華屋草創潤色意者亦有殊途乎騷賦辭清而理哀其宋玉景差之徒歟西漢文章莫大乎是非賈生其誰

目錄

賦

吊屈原賦

旱雲賦

虞賦

同前

服賦

騷

惜誓

疏

論時政疏

論積貯疏

上都輸疏

諫鑄錢疏

請封建子弟疏

諫立淮南諸子疏

論

過秦論上

過秦論中

過秦論

下

漢魏六朝百三家集卷一目錄

欽定四庫全書

漢魏六朝百三家集卷一

明 張溥 輯

漢賈誼集

賦

弔屈原賦

恭承嘉惠兮族罪長沙
仄聞屈原兮自湛汨羅
造託湘流兮敬弔先生
遭世罔極兮迺隕厥身
烏虜哀哉兮逢

時不祥鸞鳳伏氣兮鵠鵠翱翔其尊顯兮讒諛得志
賢聖逆曳兮方正倒植謂隨夷溷兮謂跖蹻廉莫邪為
鈍兮鉛刀為銛于嗟默默生之亡故兮幹棄周鼎寶康
瓠兮騰駕罷牛驟蹇驢兮驥垂兩耳服鹽車兮章父薦
屨漸不可久兮嗟苦先生獨離此咎兮諱曰已矣國其
莫吾知兮子獨壹鬱其誰語鳳縹縹其高逝兮夫固自
引而遠去襲九淵之神龍兮沕淵潛以自珍伯蠖獮以
隱處兮夫豈從蝦與蛭螾所貴聖之神德兮遠濁世而

自臧使麒麟可係而羈兮豈云異夫犬羊般紛紛其離
此郵兮亦夫子之故也歷九州而相其君兮何必懷此
都也鳳皇翔于千仞兮覽德輝而下之見細德之險微
兮遙增擊而去之彼尋常之汙瀆兮豈容吞舟之魚橫
江湖之鱣鯨兮固將制于螻螻

早雲賦

惟昊天之大旱兮失精和之正理遙望白雲之蓬勅兮
滃滃澹澹而妄止運清濁之瀕洞兮正重沓而並起鬼

隆崇以崔巍兮時彷彿而有似屈卷輪而中天兮象虎
驚與龍駭相搏據而俱興兮妾儷倚而時有遂積聚而
合沓兮相紛薄而慷慨若飛翔之從橫兮揚波怒而澎
湃正雲布而雷動兮相擊衝而破碎或窺電而四塞兮
誠若雨而不墜陰陽分而不相得兮更惟貪婪而狼戾
終風解而霧散兮遂陵遲而堵潰或深潛而閉藏兮爭
離刺而並逝廓蕩蕩其若條兮日昭昭而蕪穢隆盛暑
而無聊兮煎砂石而爛熳陽風吸習而燭燭羣生悶懣

而愁憤壘畝枯槁而失澤兮壤石相聚而為害農夫垂
拱而無事兮釋其耰鉏而下涕悲疆畔之遭禍痛皇天
之靡惠惜稚稼之早夭兮離天災而不遂懷怨心而不
能已兮竊託咎於在位獨不聞唐虞之積烈兮與三代
之風氣時俗殊而不還兮恐功久而壞敗何操行之不
得兮政治失中而違節陰氣辟而留滯兮厭暴戾而沈
沒嗟乎作孽大劇何辜于天恩澤弗宣嗇夫寡德羣生
不福來何暴也去何躁也孽孽望之其可悼也憐兮慄

兮以鬱怫兮念思白雲腸如結兮終怨不雨甚不仁兮
布而不下甚不信兮白雲何懟奈何人兮

虞賦

致太平以深志象巨獸之屈竒妙彫文以刻鏤舒循尾
之采垂舉其鋸牙以左右相指負大鍾而欲飛

同前

妙彫文以刻鏤兮象巨獸之屈竒兮戴高角之戔戔負
大鍾而顧飛美哉爛兮亦天地之大式

服賦

單閼之歲四月孟夏庚子曰斜服集余舍止於坐隅貌
甚閒暇異物來崴私怪其故發書占之讖言其度曰野
鳥入室主人將去問於子服余何去之吉庠告我凶言
其災淹速之度語余其期服乃太息舉首奮翼口不能
言請對以意萬物變化固亡休息幹流而遷或推而還
形氣轉續變化而嬗沕穆亡間胡可勝言禍兮福所倚
福兮禍所伏憂喜聚門吉凶同域彼吳彊大夫差以敗

越棲會稽句踐伯世斯遊遂成卒被五刑傳說胥靡乃
相武丁夫禍之與福何異糾纏命不可測孰知其極水
激則旱矢激則遠萬物回薄震蕩相轉雲蒸雨降糾錯
相紛大鈞播物塊垤無垠天不可與慮道不可與謀遲
速有命烏識其時且夫天地為鑪造化為工陰陽為炭
萬物為銅合散消息安有常則千變萬化未始有極忽
然為人何足控揣化為異物又何足患小智自私賤彼
貴我達人大觀物亡不可貪夫狗財烈士狗名夸者死

權品庶每生怵迫之徒或趨西東大人不曲億變齊同
愚士繫俗儻若囚拘至人遺物獨與道俱衆人惑惑好
惡積意真人恬漠獨與道息釋智遺形超然自喪寥廓
忽荒與道翱翔乘流則逝得坎則止縱軀委命不私與
已其生兮若浮其死兮若休澹濔若深淵之靚汜濔若
不繫之舟不以生故自寶養空而游德人無累知命不
憂細故芥蒂何足以疑

騷

惜誓

惜余年老而日衰兮歲忽忽而不反登蒼天而高舉兮
歷衆山而日遠觀江河之紆曲兮臨四海之霑濡攀北
極而一息兮吸沆瀣以充虛飛朱鳥使先驅兮駕太一
之象與蒼龍蚺虬於左驂兮白虎騁而為右駢建日月
以為蓋兮載玉女於後車馳騫於杳冥之中兮休息庠
崑崙之墟樂窮極而不厭兮願從容乎神明涉丹水而
馳騁兮右大夏之遺風鴻鵠之一舉兮知山川之紆曲

再舉兮睹天地之圜方臨中國之衆人兮託回飈乎尚
羊乃至少原之壑兮赤松王喬皆在旁二子擁瑟而調
均兮余因稱乎清商澹然而自樂兮吸衆氣而翱翔念
我長生而久僊兮不如反余之故鄉黃鵠後時而寄處
兮鵲巢羣而制之神龍失水而陸居兮為螻蟻之所裁
夫黃鵠神龍猶如此兮况賢者之逢亂世哉壽冉冉而
日衰兮固僵回而不息俗流從而不止兮衆枉聚而矯
直或偷合而苟進兮或隱居而深藏若稱量之不審兮

同權槩而就衡或推迤而苟容兮或直言之諤諤傷誠
是之不察兮并紉茅絲以為索方世俗之幽昏兮眩白
黑之美惡放山淵之龜玉兮相與貴夫礫石梅伯數諫
而至醢兮來革順志而用國悲仁人之盡節兮反為小
人之所賊比干忠諫而剖心箕子被髮而佯狂水背流
而源竭兮木去根而不長非重軀以慮難兮惜傷身之
無功已矣哉獨不見夫鸞鳳之高翔兮乃集太皇之墜
循四極而回周兮見盛德而後下彼聖人之神德兮遠

濁世而自藏使麒麟可得羈而係兮又何以異乎犬羊
疏

論時政疏

臣竊惟事執可為痛哭者一可為流涕者二可為長太
息者六若其它背理而傷道者難徧以疏舉進言者皆
曰天下已安已治矣臣獨以為未也曰安且治者非愚
則諛皆非事實知治亂之體者也夫抱火厝之積薪之
下而寢其上火未及燃因謂之安方今之執何以異此

本末舛逆首尾衡決國制搶攘非甚有紀胡可謂治陛下何不一令臣得熟數之於前因陳治安之策試詳擇焉夫射獵之娛與安危之機孰急使為治勞智慮苦身體乏鐘鼓之樂勿為可也樂與今同而加之諸侯軌道兵革不動民保首領匈奴賓服四荒鄉風百姓素朴獄訟衰息大數既得則天下順治海內之氣清和咸理生為明帝沒為明神名譽之美垂於無窮禮祖有功而宗有德使顧成之廟稱為太宗上配太祖與漢亡極建久

安之執成長治之業以承祖廟以奉六親至孝也以幸
天下以育羣生至仁也立經陳紀輕重同得後可以為
萬世法程雖有愚幼不肖之嗣猶得蒙業而安至明也
以陛下之明達因使少知治體者得佐下風致此非難
也其具可素陳於前願幸無忽臣謹稽之天地驗之往
古按之當今之務日夜念此至熟也雖使舜禹復生為
陛下計亡以易此夫樹國固必相疑之執下數被其殃
上數夾其憂甚非所以安上而全下也今或親弟謀為

東帝親兄之子西鄉而擊今吳又見告矣天子春秋鼎盛行義未過德澤有加焉猶尚如是況莫大諸侯權力且十此者乎然而天下少安何也大國之王幼弱未壯漢之所置傳相方握其事數年之後諸侯之王大抵皆冠血氣方剛漢之傳相稱病而賜罷彼自丞尉以上徧置私人如此有異淮南濟北之為邪此時而欲為治安雖堯舜不治黃帝曰日中必昃操刀必割今令此道順而全安甚易不肯早為已迺墮骨肉之屬而抗到之豈

有異秦之季世乎夫以天子之位乘今之時因天之助
尚憚以危為安以亂為治假設陛下居齊桓之處將不
合諸侯而匡天下乎臣又知陛下有所必不能矣假設
天下如曩時淮陰侯尚王楚黥布王淮南彭越王梁韓
信王韓張敖王趙貫高為相盧綰王燕陳豨在代令此
六七公者皆亡恙當是時而陛下即天子位能自安乎
臣有以知陛下之不能也天下殽亂高皇帝與諸公併
起非有仄室之執以豫席之也諸公幸者迺為中涓其

次厯得舍人材之不逮至遠也高皇帝以明聖威武即天子位割膏腴之地以王諸公多者百餘城少者乃三四十縣德至渥也然其後十年之間反者九起陛下之與諸公非親角材而臣之也又非身封王之也自高皇帝不能以是一歲為安故臣知陛下之不能也然尚有可諉者曰疏臣請試言其親者假令悼惠王王齊元王王楚中子王趙幽王王淮陽共王王梁靈王王燕厲王王淮南六七貴人皆亡恙當是時陛下即位能為治乎

臣又知陛下之不能也。若此諸王雖名為臣實皆有布衣昆弟之心。慮亡不帝制而天子自為者。擅爵人赦死罪甚者或戴黃屋。漢法令非行也。雖行不軌如厲王者。令之不肯聽。召之安可致乎。幸而來至法安可得加。動一親戚天下園視而起。陛下之臣雖有悍如馮敬者。適啟其口七首已陷其匈矣。陛下雖賢誰與領此。故疏者必危。親者必亂。已然之效也。其異姓負彊而動者。漢已幸勝之矣。又不易其所以然。同姓襲是跡而動。既有徵

矣其執盡又復然殃馮之變未知所移明帝處之尚不能以安後世將如之何屠牛坦一朝解十二牛而芒刃不頓者所排擊剝割皆衆理解也至於髡髀之所非斤則斧夫仁義恩厚人主之芒刃也權執法制人主之斤斧也今諸侯王皆衆髡髀也釋斤斧之用而欲嬰以芒刃臣以為不缺則折胡不用之淮南濟北執不可也臣竊跡前事大抵彊者先反淮陰王楚最彊則最先反韓信倚胡則又反貫高因趙資則又反陳豨兵精則又反

彭越用梁則又反黥布用淮南則又反盧綰最弱最後
反長沙迺在二萬五千戶耳功少而最完執跡而最忠
非獨性異人也亦形執然也曩令樊鄴絳灌據數十城
而王今雖以殘亡可也令信越之倫列為徹侯而居雖
至今存可也然則天下之大計可知已欲諸王之皆忠
附則莫若令如長沙王欲臣子勿莖醢則莫若令如樊
鄴等欲天下之治安莫若衆建諸侯而少其力力少則
易使以義國小則亡邪心令海內之執如身之使臂臂

之使指莫不制從諸侯之君不敢有異心輻輳並進而
歸命天子雖在細民且知其安故天下咸知陛下之明
割地定制令齊趙楚各為若干國使悼惠王幽王元王
之子孫畢以次各受祖之分地地盡而止及燕梁他國
皆然其分地衆而子孫少者建以為國空而置之須其
子孫生者舉使君之諸侯之地其削頗入漢者為徙其
侯國及封其子孫也所以數償之一寸之地一人之衆
天子亡所利焉誠以定治而已故天下咸知陛下之廉

地制一定宗室子孫莫慮不王下無倍畔之心上無誅
伐之志故天下咸知陛下之仁法立而不犯令行而不
逆貫高利幾之謀不生柴竒開章之計不萌細民鄉善
大臣致順故天下咸知陛下之義臥赤子天下之上而
安植遺腹朝委裘而天下不亂當時大治後世誦聖一
動而五業附陛下誰憚而久不為此天下之執方病大
瘰一脰之大幾如要一指之大幾如股平居不可屈信
一二指搗身慮亡聊失今不治必為痼疾後雖有扁鵲

不能為已病非徒瘡也又苦踈盤元王之子帝之從弟也今之王者從弟之子也惠王親兄子也今之王者兄子之子也親者或亡分地以安天下疏者或制大權以偪天子臣故曰非徒病瘡也又苦踈盤可為痛哭者此病是也天下之勢方倒縣凡天子者天下之首何也上也蠻夷者天下之足何也下也今匈奴嫚侮侵掠至不敬也為天下患至亡已也而漢歲致金絮采繒以奉之夷狄徵令是主上之操也天子共貢是臣下之禮也足

反居上首顧居下倒縣如此莫之能解猶為國有人乎
非亶倒縣而已又類辟且病癰夫辟者一面病癰者一
方痛今西邊北邊之郡雖有長爵不輕得復五尺以上
不輕得息斥候望烽燧不得卧將吏被介冑而睡臣故
曰一方病矣醫能治之而上不使可為流涕者此也陛
下何忍以帝王之號而為戎人諸侯執既卑辱而旣不
息長此安窮進謀者率以為是固不可解也亡具甚矣
臣竊料匈奴之衆不過漢一大縣以天下之大困於一

縣之衆甚為執事者羞之陛下何不試以臣為屬國之
官以主匈奴行臣之計請必係單于之頸而制其命伏
中行說而笞其背舉匈奴之衆唯上之令今不獵猛獸
而獵田彘不搏反寇而搏畜兔翫細娛而不圖大患非
所以為安也德可遠施威可遠加而直數百里外威令
不信可為流涕者此也今民賣僮者為之繡衣絲履偏
諸緣內之閑中是古天子后服所以廟而不宴者也而
庶人得以衣婢妾白縠之表薄紈之裏綈以偏諸美者

黼黻是古天子之服今富人大賈嘉會召客者以被牆
古者以奉一帝一后而節適令庶人屋壁得為帝服倡
優下賤得為后飾然而天下不屈者殆未有也且帝之
身自衣阜緋而富民牆屋被文繡天子之后以緣其領
庶人夔妾以緣其履此臣所謂舛也夫百人作之不能
衣一人欲天下亡寒胡可得也一人耕之十人聚而食
之欲天下亡饑不可得也饑寒切於民之肌膚欲其亡
為姦邪不可得也國已屈矣盜賊直湏時耳然而獻計

者曰毋動為大耳夫俗至大不敬也至亡等也至冒上也進計者猶曰毋為可為長太息者此也商君遺禮誼棄仁恩并心於進取行之二歲秦俗日敗故秦人家富子壯則出分家貧子壯則出贅借父耰耨慮有德色母取箕箒立而諄語抱哺其子與公併侶婦姑不相說則反脣而相稽其慈子嗜利不同禽獸者亡幾耳然并心而赴時猶曰歷六國兼天下功成求得矣終不知反廉愧之節仁義之厚信并兼之法遂進取之業天下大敗

衆掩寡智欺愚勇威怯壯陵衰其亂至矣是以大賢起
之威震海內德從天下曩之為秦者今轉而為漢矣然
其遺風餘俗猶尚未改今世以侈靡相競而上亡制度
棄禮誼捐廉恥日甚可謂月異而歲不同矣逐利不耳
慮非顧行也今其甚者殺父兄矣盜者剽寢戶之簾褰
兩廟之器白晝大都之中剽吏而奪之金矯偽者出幾
十萬石粟賦六百餘萬錢乘傳而行郡國此其亡行義
之尤至者也而大臣特以簿書不報期會之間以為大

故至於俗流失世壞敗因恬而不知恠慮不動於耳目
以為是適然耳夫移風易俗使天下回心而鄉道類非
俗吏之所能為也俗吏之所務在於刀筆筐篋而不知
大體陛下又不自憂竊為陛下惜之夫立君臣等上下
使父子有禮六親有紀此非天之所為人之所設也夫
人之所設不為不立不植則僵不修則壞莞子曰禮義
廉恥是謂四維四維不張國乃滅亡使莞子愚人也則
可莞子而少知治體則是豈可不為寒心哉秦滅四維

而不張故君臣乖亂六親殃戮姦人並起萬民離叛凡
十三歲而社稷為墟今四維猶未備也故姦人幾幸而
衆心疑惑豈如今定經制令君君臣臣上下有差父子
六親各得其宜姦人亡所幾幸而羣臣衆信上不疑惑
此業一定世世常安而後有所持循矣若夫經制不定
是猶渡江河亡維楫中流而遇風波船必覆矣可為長
太息者此也夏為天子十有餘世而殷受之殷為天子
二十餘世而周受之周為天子三十餘世而秦受之秦

為天子二世而亡人性不甚相遠也何三代之君有道之長而秦無道之暴也其故可知也古之王者太子廼生固舉以禮使士負之有司齊肅端冕見之南郊見于天也過闕則下過廟則趨孝子之道也故自為赤子而教固已行矣昔者成王幼在緇抱之中召公為太保周公為太傅太公為太師保保其身體傳傳之德義師道之教訓此三公之職也於是為置三少皆上大夫也曰少保少傅少師是與太子宴者也故迺孩提有識三公

三少固明孝仁禮義以道習之遂去邪人不使見惡行
於是皆選天下之端士孝悌博聞有道術者以衛翼之
使與太子居處出入故太子迺生而見正事聞正言行
正道左右前後皆正人也夫習與正人居之不能毋正
猶生長於齊不能不齊言也習與不正人居之不能毋
不正猶生長於楚之地不能不楚言也故擇其所嗜必
先受業乃得嘗之擇其所樂必先有習迺得為之孔子
曰少成若天性習貫如自然及太子少長知妃色則入

于學學者所學之官也學禮曰帝入東學上親而貴仁則親疏有序而恩相及矣帝入南學上齒而貴信則長幼有差而民不誣矣帝入西學上賢而貴德則聖智在位而功不遺矣帝入北學上貴而尊爵則貴賤有等而下不隲矣帝入太學承師問道退習而考於太傅太傅罰其不則而匡其不及則德智長而治道得矣此五學者既成於上則百姓黎民化輯於下矣及太子既冠成人免於保傅之嚴則有記過之史徹膳之宰進善之旌

誹謗之木敢諫之鼓瞽史誦詩工誦箴諫大夫進謀士
傳民語習與智長故切而不愧化與心成故中道若性
三代之禮春朝朝日秋暮夕月所以明有敬也春秋入
學坐國老執醬而親餽之所以明有孝也行以鸞和步
中采齊趣中肆夏所以明有度也其於禽獸見其生不
忍其死聞其聲不食其肉故遠庖厨所以長恩且明有
仁也夫三代之所以長久者以其輔翼太子有此具也
及秦而不然其俗固非貴辭讓也所上者告訐也固非

貴禮義也所上者刑罰也使趙高傳胡亥而教之獄所
習者非斬劓人則夷人之三族也故胡亥今日即位而
明日射人忠諫者謂之誹謗深計者謂之妖言其視殺
人若艾草菅然豈惟胡亥之性惡哉彼其所以道之者
非其理故也鄙諺曰不習為吏視已成事又曰前車覆
後車誡夫三代之所以長久者其已事可知也然而不
能從者是不法聖智也秦世之所以亟絕者其轍跡可
見也然而不避是後車又將覆也夫存亡之變安危之

機其要在是矣天下之命縣於太子太子之善在於早
諭教與選左右夫心未濫而先諭教則化易成也聞於
道術智誼之指則教之力也若其服習積貫則左右而
已夫胡粵之人生而同聲嗜欲不異及其長而成俗累
數譯而不能相通行者有雖死而不相為者則教習然
也臣故曰選左右早諭教最急夫教得而左右正則太
子正矣太子正而天下定矣書曰一人有慶兆民賴之
此時務也凡人之智能見已然不能見將然夫禮者禁

於將然之前而法者禁於已然之後是故法之所用易見而禮之所為難知也若夫慶賞以勸善刑罰以懲惡先王執此之政堅如金石行此之令信如四時據此之公無私如天地耳豈顧不用哉然而曰禮云禮云者貴絕惡於未萌而起教於微眇使民日遷善遠邇而不自知也孔子曰聽訟吾猶人也必也使毋訟乎為人主計者莫如先審取舍取舍之極定於內而安危之萌應於外矣安者非一日而安也危者非一日而危也皆以積

漸然不可不察也人主之所積在於取舍以禮義治之者積禮義以刑罰治之者積刑罰刑罰積而民怨背禮義積而民和親故世主欲民之善同而所以使民善者或異或道之以德教或毆之以法令道之以德教者德教洽而民氣樂毆之以法令者法令極而民風哀哀樂之感禍福之應也秦王之欲尊宗廟而安子孫與湯武同然而湯武廣大其德行六七百載而弗失秦王治天下十餘歲則大敗此亡它故矣湯武之定取舍審而秦

王之定取舍不審矣夫天下大器也今人之置器置諸
安處則安置諸危處則危天下之情與器亡以異在天
子之所置之湯武置天下於仁義禮樂而德澤洽禽獸
草木廣裕德被蠻貊四夷累子孫數十世此天下所共
聞也秦王置天下於法令刑罰德澤亡一有而怨毒盈
於世下憎惡之如仇讐旣幾及身子孫誅絕此天下之
所共見也是非其明效大驗邪人之言曰聽言之道必
以其事觀之則言者莫敢妄言今或言禮誼之不如法

令教化之不如刑罰人主胡不引殷周秦事以觀之也
人主之尊譬如堂羣臣如陛衆庶如地故陛九級上廉
遠地則堂高陛亡級廉近地則堂卑高者難攀卑者易
陵理執然也故古者聖王制為等列內有公卿大夫士
外有公侯伯子男然後有官師小吏延及庶人等級分
明而天子加焉故其尊不可及也里諺曰欲投鼠而忌
器此善諭也鼠近於器尚憚不投恐傷其器況於貴臣
之近主乎廉恥節禮以治君子故有賜死而亡戮辱是

以黜劓之辜不及大夫以其離主上不遠也禮不敢齒君之路馬蹙其芻者有罰見君之几杖則起遭君之乘車則下入正門則趨君之寵臣雖或有過刑戮之辜不加其身者尊君之故也此所以為主上豫遠不敬也所以體貌大臣而厲其節也今自王侯三公之貴皆天子之所改容而禮之也古天子之所謂伯父伯舅也而令與衆庶同黜劓髡刑笞僇棄市之法然則堂不亡陞乎被戮辱者不忝迫辱廉耻不行大臣無迺握重權太官

而有徒隸亡恥之心虐夫望夷之事二世見當以重法
者投鼠而不忌器之習也臣聞之履雖鮮不加於枕冠
雖敝不以苴履夫嘗已在貴寵之位天子改容而體貌
之矣吏民嘗俯伏以敬畏之矣今而有過帝令廢之可
也退之可也賜之死可也滅之可也若夫束縛之係縲
之輸之司寇編之徒官司寇小吏詈罵而榜笞之殆非
所以令衆庶見也夫卑賤者習知尊貴者之一旦吾亦
迺可以加此也非所以習天下也非尊尊貴貴之化也

夫天子之所嘗敬衆庶之所嘗寵死而死耳賤人安宜得如此而頃辱之哉豫讓事中行之君智伯伐而滅之移事智伯及趙滅智伯豫讓繫面吞炭必報襄子五起而不中人間豫子豫子曰中行衆人畜我我故衆人事之智伯國士遇我我故國士報之故此一豫讓也反君事讐行若狗彘已而抗節致忠行出乎列士人主使然也故主上遇其大臣如遇犬馬彼將犬馬自為也如遇官徒彼將官徒自為也頑頓亡恥隳詬亡節廉恥不立

且不自好苟若而可故見利則逝見便則奪主上有敗
則因而挺之矣主上有患則吾苟免而已立而觀之耳
有便吾身者則欺賣而利之耳人主將何便於此羣下
至衆而主上至少也所託財器職業者粹於羣下也俱
亡恥俱苟妄則主上最病故古者禮不及庶人刑不至
大夫所以厲寵臣之節也古者大臣有坐不廉而廢者
不謂不廉曰簠簋不飭坐污穢淫亂男女無別者不曰
汙穢曰帷薄不修坐罷軟不勝任者不謂罷軟曰下官

不職故貴大臣定有其罪矣猶未斥然正以諱之也尚遷就而為之諱也故其在大譴大訶之域者聞譴訶則白冠鵲纓盤水加劔造請室而請臯耳上不執縛係引而行也其有中罪者聞命而自弛上不使人頸鑿而加也其有大罪者聞命則北面再拜跪而自裁上不使捽抑而刑之也曰子大夫自有過耳吾過子有禮矣過之有禮故羣臣自憚嬰以廉恥故人矜節行上設廉恥禮義以過其臣而臣不以節行報其上者則非人類也故

化成俗定則為人臣者主耳忘身國耳忘家公耳忘私
利不苟就害不苟去唯義所在上之化也故父兄之臣
誠死宗廟法度之臣誠死社稷輔翼之臣誠死君上守
圖扞敵之臣誠死城郭封疆故曰聖人有金城者此物
此志也彼且為我死故吾得與之俱生彼且為我亡故
吾得與之俱存夫將為我危故吾得與之皆安顧行而
忘利守節而仗義故可以託不御之權可以寄六尺之
孤此厲廉恥行禮義之所致也主上何喪焉此之不為

而顧彼之久行故曰可為長太息者此也

論積貯疏

堯子曰倉廩實而知禮節民不足而可治者自古及今
未之嘗聞古之人曰一夫不耕或受之飢一女不織或
受之寒生之有時而用之亡度則物力必屈古之治天
下至纖至悉故其畜積足恃今背本而趨末食之者甚
衆是天下之大殘也淫侈之俗日月以長是天下之大
賊也殘賊公行莫之或止大命將泛莫之振救生之者

甚少而靡之者甚多天下財產何得不廢漢之為漢幾
四十年矣公私之積猶可哀痛失時不雨民且狼顧歲
惡不入請賣爵子既聞耳矣安有為天下陷危者若是
而上不驚者世之有飢穰天之行也禹湯被之矣即不
幸有方二三千之旱國胡以相恤卒然遘境有急數
十百萬之衆國胡以餽之兵旱相乘天下大屈有勇力
者聚徒而衡擊罷夫羸老易子而敵其骨政治未畢道
也遠方之能疑者並舉而爭起矣迺駭而圖之豈將有

及乎夫積貯者天下之大命也苟粟多而財有餘何為
而不成以攻則取以守則固以戰則勝懷敵附遠何招
而不至今毆民而歸之農皆著於本使天下各食其力
未技游食之民轉而緣南畝則畜積足而人樂其所矣
可以為富安天下而直為此廩廩也

上都輸疏

天子都長安而以淮南東道為奉地鑿道數千不輕致
輸郡或乃越諸侯而遠調均發徵至無狀也古者天子

之地方千里中之而為都輸將繇使其遠者不在五百里而至公侯地百里中之而為都輸將繇使遠者不在五十里而至輸者不苦其繇繇者不傷其費故遠方人安及秦不能分人寸地欲自有之輸將起海上而來一錢之賦數十錢之費不輕而致也上之所得甚少而人之苦甚多也

諫鑄錢疏

孝文五年為錢多而輕乃更鑄四銖錢其文為半兩除盜鑄錢令使民放

鑄誼諫
不聽

法使天下公得顧祖鑄銅錫為錢敢雜以鉛鐵為它巧者其罪黥然鑄錢之情非穀雜為巧則不可得贏而穀之甚微為利甚厚夫事有召禍而法有起奸今令細民人操造幣之勢各隱屏而鑄作因欲禁其厚利微奸雖黥罪日報其執不止迺者民人抵罪多者一縣百數及吏之所疑榜笞奔走者甚衆夫縣法以誘民使入陷阱孰積於此曩禁鑄錢死罪積下今公鑄錢黥罪積下為法若此上何賴焉又民用錢郡縣不同或用輕錢百加

若干或用重錢平稱不受法錢不立吏急而壹之庠則
大為煩苛而力不能勝縱而弗呵庠則市肆異用錢文
大亂苟非其術何鄉而可哉今農事棄捐而采銅者日
蕃釋其耒耨冶鑄炊炭奸錢日多五穀不為多善人怵
而為奸邪愿民陷而之刑戮刑戮將甚不詳奈何而忽
國知患此吏議必曰禁之禁之不得其術其傷必大令
禁鑄錢則錢必重重則其利深盜鑄如雲而起棄市之
罪又不足以禁矣奸數不勝而法禁數潰銅使之然也

故銅布於天下其為禍博矣今博禍可除而七福可致也何謂七福上收銅勿令布則民不鑄錢黥罪不積一矣偽錢不蕃民不相疑二矣采銅鑄作者反於耕田三矣銅畢歸於上上挾銅積呂御輕重錢輕則呂術斂之重則呂術散之貨物必平四矣呂作兵器呂假貴臣多少有制用別貴賤五矣呂臨萬貨呂調盈虛呂收奇羨則官富實而末民困六矣制吾器財呂與匈奴逐爭其民則敵必懷七矣故善為天下者因禍而為福轉敗而

為功今久退七福而行博禍臣誠傷之

請封建子弟疏

陛下即不定制如今之執不過一傳再傳諸侯猶且人恣而不制豪植而太强漢法不得行矣陛下所以為蕃扞及皇太子之所恃者唯淮陽代二國耳代北邊匈奴與强敵為鄰能自完則足矣而淮陽之比大諸侯厯如黑子之著面適足以餌大國耳不足以有所禁禦方今制在陛下制國而令子適足以為餌豈可謂工哉人主

之行異布衣布衣者飾小行競小廉以自託於鄉黨人主唯天下安社稷固不耳高皇帝瓜分天下以王功臣反者如蝟毛而起以為不可故薪去不義諸侯而虛其國擇良日立諸子雒陽上東門之外畢以為王而天下安故大人者不牽小行以成大功今淮南地遠者或數千里越兩諸侯而縣屬於漢其吏民繇役往來長安者自悉而補中道衣敝錢用諸費稱此其苦屬漢而欲得王至甚遁逃而歸諸侯者已不少矣其執不可久臣之

愚計願舉淮南地以益淮陽而為梁王立後割淮陽北
邊二三列城與東郡以益梁不可者可徙代王而都睢
陽梁起於新鄭以北著之河淮陽包陳以南捷之江則
夫諸侯之有異心者破膽而不敢謀梁足以扞齊趙淮
陽足以禁吳楚陛下高枕終亡山東之憂矣此二世之
利也當今恬然適遇諸侯之皆少數歲之後陛下且見
之矣夫秦日夜苦心勞力以除六國之禍今陛下力制
天下順指如意高拱以成六國之禍難以言智苟身亡

事畜亂宿禍熟視而不定萬年之後傳之老母弱子將使不寧不可謂仁臣聞聖主言問其臣而不自造事故使人臣得畢其愚忠唯陛下裁幸

諫立淮南諸子疏

竊恐陛下接王淮南諸子曾不與如臣者熟計之也淮南王之悖逆亡道天下孰不知其辜陛下幸而赦遷之自疾而死天下孰以王死之不當今奉尊罪人之子適足以負謗於天下耳此人少壯豈能忘其父哉白公勝

所為父報仇者大父與伯父叔父也白公為亂非欲取
國代主也發忿快志剗手以衝仇人之勾固為俱靡而
已淮南雖小黥布嘗用之矣漢存特幸耳夫擅仇人足
以危漢之資於策不便雖割而為四四子一心也子之
衆積之財此非有子胥白公報於廣都之中即疑有剗
諸荆軻起於兩柱之間所謂假賊兵為虎翼者也願陛
下少留計

論

過秦論上

秦孝公據殽函之固擁雍州之地君臣固守以窺周室
有席卷天下包舉宇內囊括四海之意并吞八荒之心
當是時商君佐之內立法度務耕織修守戰之備外連
衡而關諸侯於是秦人拱手而取西河之外孝公既沒
惠文武昭蒙故業因遺策南取漢中西舉巴蜀東割膏
腴之地收要害之郡諸侯恐懼會盟而謀弱秦不愛珍
器重寶肥美之地以致天下之士合從締交相與為一

當是時齊有孟嘗趙有平原楚有春申魏有信陵此四
君者皆明智而忠信寬厚而愛人尊賢而重士約從離
衡并韓魏燕楚齊趙宋衛中山之衆於是六國之士有
寧越徐尚蘇秦杜赫之屬為之謀齊明周最陳軫召滑
樓緩翟景蘇厲樂毅之徒通其意吳起孫臏帶佗兒良
王廖田忌廉頗趙奢之倫制其兵常以十倍之地百萬
之衆叩關而攻秦秦人開關而延敵九國之師逡巡遁
逃而不敢進秦無亡矢遺鏃之費而天下諸侯已困矣

於是從散約解爭割地而賂秦秦有餘力而制其敝追亡逐
北伏尸百萬流血漂鹵因利乘便宰割天下分裂河
山疆國請服弱國入朝廷及孝文王莊襄王享國日淺
國家無事及至始皇奮六世之餘烈振長策而御宇內
吞二周而亡諸侯履至尊而制六合執敲扑以鞭笞天
下威振四海南取百越之地以為桂林象郡百越之君
俛首係頸委命下吏乃使蒙恬北築長城而守藩籬却
匈奴七百餘里胡人不敢南下而牧馬士不敢彎弓而

報怨於是廢先王之道焚百家之言以愚黔首墮名城
殺豪俊收天下之兵聚之咸陽銷鋒鑄鋸以為金人十
二以弱天下之民然後踐華為城因河為池據億丈之
城臨不測之谿以為固良將勁弩守要害之處信臣精
卒陳利兵而誰何天下已定始皇之心自以為關中之
固金城千里子孫帝王萬世之業也始皇既沒餘威振
於殊俗然而陳涉甕牖繩樞之子甿隸之人而遷徙之
徒才能不及中庸非有仲尼墨翟之賢陶朱猗頓之富

躡足行伍之間而崛起阡陌之中率罷散之卒將數百
之衆轉而攻秦斬木為兵揭竿為旗天下雲集響應羸
糧而景從山東豪俊遂並起而亡秦族矣且夫天下非
小弱也雍州之地殽函之固自若也陳涉之位非尊於
齊楚燕趙韓魏宋衛中山之君也鉏耰棘矜非銛於鉤
戟長鎗也適戍之衆非抗於九國之師也深謀遠慮行
軍用兵之道非及曩時之士也然而成敗異變功業相
反試使山東之國與陳涉度長絜大比權量力則不可

同年而語矣然秦以區區之地致萬乘之權招八州而
朝同列百有餘年矣然後以六合為家殽函為宮一夫
作難而七廟墮身死人手為天下笑者何也仁義不施
而攻守之勢異也

過秦論

中

秦并海內兼諸侯南面稱帝以養四海天下之士斐然
鄉風若是者何也曰近古之無王者久矣周室卑微五
霸既沒今不行於天下是以諸侯力勁彊侵弱衆暴寡

兵革不休士民罷敝今秦南面而王天下是上有天子也即元元之民冀得安其性命莫不虛心而仰上當此之時守威定功安危之本在於此矣始皇懷貪鄙之心行自奮之智不信功臣不親士民廢王道立私權禁刑書而酷刑法先詐力而後仁義以暴虐為天下始夫并兼者高詐力安定者貴順權此言取與守不同術也秦離戰國而王天下其道不易其政不改是其所以取之守之者異也孤獨而有之故其亡可立而待借使始皇

計上世之事並殷周之迹以制御其政後雖有淫驕之主猶未有傾危之患也故三王之建天下名號顯美功業長久今秦二世立天下莫不引領而觀其政夫寒者利裋褐而飢者甘糟糠天下之嗷嗷新主之資也此言勞民之易為仁也鄉使二世有庸主之行而任忠賢臣主一心而憂海內之患縞素而正先帝之過裂地分民以封功臣之後建國立君以禮天下虛囹圄而免刑戮除去收帑汙穢之罪使各反其鄉里發倉廩散財幣以

振孤獨窮困之士輕賦少事以佐百姓之急約法省刑以持其後使天下之人皆得自新更節脩行各慎其身塞萬民之望而以盛德與天下天下集矣即四海之內皆謹然各自安樂其處唯恐有變雖有狡猾之民無離上之心則不軌之臣無以飾其智而暴亂之奸止矣二世不行此術而重之以無道壞宗廟與民更始作阿房宮繁刑嚴誅吏治刻深賞罰不當賦斂無度天下多事吏弗能紀百姓困窮而主不收恤然後奸偽並起而上

下相道蒙罪者衆刑戮相望於道而天下苦之自君卿
以下至於衆庶人懷自危之心親處窮苦之實咸不安
其位故易動也是以陳涉不用湯武之賢不藉公侯之
尊奮臂於大澤而天下響應者其民危也故先王見始
終之變知存亡之機是以牧民之道務在安之而已天
下雖有逆行之臣必無響應之助矣故曰安民可與行
義而危民易與為非此之謂也貴為天子富有天下身
不免於殘殺者政傾非也是二世之過也

過秦論

下


秦并兼諸侯山東三十餘郡繕津關據險塞修甲兵而
守之然陳涉以戍卒散亂之衆數百奮臂大呼不用弓
戟之兵鉏耰白挺望屋而食橫行天下秦人阻險不守
關梁不闔長戟不刺彊弩不射楚師深入戰於鴻門曾
無藩籬之艱於是山東大擾諸侯並起豪俊相立秦使
章邯將而東征章邯因以三軍之衆要市於外以謀其
上羣臣之不相信可見於此矣子嬰立遂不寤藉使子

嬰有庸主之材僅得中佐山東雖亂三秦之地可全而有宗廟之祀未當絕也秦地被山帶河以為固四塞之國也自繆公以來至於始皇二十餘君常為諸侯雄豈世世賢哉其勢居然也且天下嘗同心并力而攻秦矣當此之時賢智並列良將行其師賢相通其謀然困於阻險而不能進秦乃延入戰而為之開關百萬之徒逃北而遂壞豈勇力智慧不足哉形不利勢不便也秦雖小邑并大城守險塞而軍高壘毋戰開關據阨荷戟而守之諸

侯起於匹夫以利合非有素王之行也其交未親其下未附名為亡秦其實利之也彼見秦阻之難犯也必退師安土息民以待其敝收弱扶罷以令大國之君不患不得意於海內貴為天子富有天下而身為禽者其救敗非也始皇足已不問遂過而不變二世受之因而不改暴虐以重禍子嬰孤立無親危弱無輔三主惑而終身不悟亡不亦宜乎當此時也世非無深慮知化之士也然所以不敢盡忠拂過者秦俗多忌諱之禁忠言未

卒於口而身為戮沒矣故使天下之士傾耳而聽重足
而立箝口而不言是以三主失道忠臣不敢諫智士不
敢謀天下已亂奸不上聞豈不哀哉先王知壅蔽之傷
國也故置公卿大夫士以飾法設刑而天下治其彊也
禁暴誅亂而天下服其弱也五伯征而諸侯從其削也
內守外附而社稷存故秦之盛也繁法嚴刑而天下振
及其衰也百姓怨望而海內畔矣故周王序得其道而
千餘歲不絕秦本末並失故不長久由此觀之安危之

統相去遠矣野諺曰前事之不忘後事之師也是以君子為國觀之上古驗之當世參以人事察盛衰之理審權勢之宜去就有序變化有時故曠日長久而社稷安矣



漢魏六朝百三家集卷一

欽定四庫全書

集部

漢魏六朝百三家集卷二

詳校官庶吉士

臣謝恭銘

主事銜

臣

徐以坤覆勘

總校官檢討

臣

何思鈞

校對官編修

臣

嚴福

謄錄監生

臣

朱上林

欽定四庫全書

漢魏六朝百三家集卷二

漢司馬相如集題詞

梁昭明太子文選登采絕嚴獨於司馬長卿取其三賦四文其生平壯篇畧具殆心篤好之沉湎終日而不能舍也太史公曰長卿賦多虛辭濫說要歸節儉與詩諷諫何異余讀之良然子虛上林非徒極博寔發於天材楊子雲銳精揣

鍊僅能合轍然疎密大致猶漢書於史記也美人賦風詩之尤上掩宋玉蓋長卿風流誕放深於論色即其所自叙傳琴心善感好女夜亡史遷形狀安能及此他人之賦賦才也長卿賦心也得之於內不可以傳彼曾與盛長通言之歌合組賦列錦均未喻耳獵獸獸獻書長揚志直馳檄發難巴蜀竦聽慕蘭生之浥池跨唐蒙於絕域赤車駟馬足名丈夫抑其文皆賦流也生賦

長門沒留封禪英主怨后思眷不忘豈偶然乎

目錄

賦

子虛賦

上林賦

大人賦

長門賦

美人賦

哀二世賦

書

諫獵書

報卓文君書

檄

論巴蜀檄

難

難蜀父老文

符命

封禪文

傳

自叙傳

歌

琴歌二首

漢魏六朝百三家集卷二目錄

欽定四庫全書

漢魏六朝百三家集卷二

明 張溥 輯

漢司馬相如集

賦

子虛賦

楚使子虛使於齊齊王悉發境內之士備車騎之衆與
使者出畋畋罷子虛過說烏有先生而亡是公存焉坐



定烏有先生問曰今日畋樂乎子虛曰樂獲多乎曰少
然則何樂對曰僕樂齊王之欲誇僕以車騎之衆而僕
對以雲夢之事也曰可得聞乎子虛曰可王駕車千乘
選徒萬騎畋於海濱列卒滿澤罟網彌山掩兔轡鹿射
麋腳麟鷺於鹽浦割鮮染輪射中獲多矜而自功顧謂
僕曰楚亦有平原廣澤遊獵之地饒樂若此者乎楚王之
之獵孰與寡人乎僕下車對曰臣楚國之鄙人也幸得
宿衛十有餘年時從出遊遊於後園覽於有無然猶未

能徧覩也又焉足以言其外澤者乎齊王曰雖然畧以
子之所聞見而言之僕對曰唯唯臣聞楚有七澤嘗見
其一未覩其餘也臣之所見蓋特其小小者耳名曰雲
夢雲夢者方九百里其中有山焉其山則盤紆靡鬱隆
崇聳萃岑峯參差日月蔽虧交錯糾紛上千青雲罷池
陂陀下屬江河其土則丹青赭堊雌黃白垺錫碧金銀
衆色炫燿照爛龍鱗其石則赤玉玫瑰琳琅昆吾玳瑁
玄厲硨磲其東則有蕙圃蘅蘭蒨若射干芎藭菖

蒲江離蘼蕪諸柘巴苴其南則有平原廣澤登降阨靡
案衍壇曼緣以大江限以巫山其高燥則生葳蕤苞荔
薜莎青蘋其埤濕則生藏蓂蒹葭東蔭彫胡蓮藕觚蘆
菴蘭軒于衆物居之不可勝圖其西則有湧泉清池激
水推移外發芙蓉菱華內隱鉅石白沙其中則有神龜
蛟鼉瑇瑁鼈黿其北則有陰林其樹榿柟豫樟桂椒木
蘭藥離朱楊檣梨栲栗橘柚芬芳其上則有赤猿獬猱
鵠鷗孔鸞騰遠射于其下則有白虎玄豹蝮蛇羆狌於

是乎乃使專諸之倫手格此獸楚王乃駕馴駁之駟乘
彫玉之輿靡魚鬚之橈旃曳明月之珠旗建干將之雄
戟左烏號之彫弓右夏服之勁箭陽子驂乘纖阿為御
案節未舒即凌狡獸蹙蹙蛩蛩距虛軼野馬馳駒駘乘
遺風射游騏儵伸倩洌雷動焱至星流霆擊弓不虛發
中必決背洞胸達掖絕乎心繫獲若雨獸揜草蔽地於
是楚王乃弭節徘徊翱翔容與覽乎陰林觀壯士之暴
怒與猛獸之恐懼徼執受誦殫覩衆物之變態於是鄭

女曼姬被阿錫揄紵縞雜織羅垂霧縠襃積縐紆徐
委曲鬱撓谿谷紛紛霏霏揚施戍削飛襪垂髻扶輿倚
靡翕呶萃蔡下摩蘭蕙上拂羽蓋錯翡翠之歲蕤繆繞
玉綬眇眇忽忽若神仙之髣髴於是乃相與獮於蘭圃
嬰姍敔窳而上乎金隄揜翡翠射駿驥微增出纖縠施
弋白鵠連駕鸞雙鶴下玄鶴加怠而後發游於清池浮
文鷁揚旌棹張翠帷建羽蓋網瑇瑁釣紫貝擬金鼓吹
鳴籟榜人歌聲流喝水蟲駭波鴻沸涌泉起犇楊會石

石相擊碌碌礚礚若雷霆之聲聞乎數百里之外將息
獠者擊靈鼓起烽燧車案行騎就隊纚乎淫淫般乎裔
裔於是楚王乃登雲陽之臺泊乎無為澹乎自持勺藥之
和具而後御之不若大王終日馳騁曾不下輿將割輪
焯自以為娛臣竊觀之齊殆不如於是齊王無以應
僕也烏有先生曰是何言之過也足下不遠千里來貺
吾國王悉發境內之士備車騎之衆與使者出畋乃欲
戮力致獲以娛左右何名為夸哉問楚地之有無者願

聞大國之風烈先生之餘論今足下不稱楚王之德厚而盛推雲夢以為高奢言淫樂而顯侈靡竊為足下不取也必若所言固非楚國之美也有而言之是彰君之惡無而言之是害足下之信彰君之惡而傷私義二者無一可也而先生行之必且輕於齊而累於楚矣且齊東渚鉅海南有琅邪觀乎成山射乎之罘浮渤海遊益諸邪與肅慎為鄰右以湯谷為界秋田乎青丘彷徨乎海外吞若雲夢者八九於其胸中曾不蒂芥若乃儗僣

瑰瑋異方殊類珍怪鳥獸萬端鱗萃充牣其中者不可
勝記禹不能名高不能計然在諸侯之位不敢言游戲
之樂苑囿之大先生又見客是以王辭而不復何為無
以應哉

上林賦

亡是公听然而笑曰楚則失矣而齊亦未為得也夫使
諸侯納貢者非為財帛所以述職也封疆畫界者非為
守禦所以禁淫也今齊列為東藩而外私肅慎捐國踰

限越海而田其於義固未可也且夫二君之論不務明君臣之義正諸侯之禮徒事爭遊戲之樂苑囿之大欲以奢侈相勝荒淫相越此不可以揚名發譽而適足以卑君自損也且夫齊楚之事又烏足道乎君未覩大巨麗也獨不聞天子之上林乎左蒼梧右西極丹水更其南紫淵徑其北終始灞澹出入涇渭鄠鎬潦漓紆餘逶迤經營乎其內蕩蕩乎八川分流相背而異態東西南北馳騫往來出乎椒丘之闕行乎洲淤之浦經乎桂林

之中過乎決滌之野汨乎混流順阿而下赴隘陘之口
觸穹石激堆埼沸乎暴怒洶涌澎湃渾沸沍汨偪側泌
瀄橫流逆折轉騰激洄滂濞沆溉穹隆雲橈宛渾膠戾
踰波趨浥莅莅下瀨批巖衝擁犇揚滯沛臨坻注壑瀼
瀼霄墜沈沈隱隱砰磅訇磕潏潏淢淢淢淢淢淢淢淢
跳沫汨潏漂疾悠遠長懷寂寥無聲肆乎永歸然後灝
灝潢潢安翔徐回翺乎瀉瀉東注太湖衍溢陂池於是
乎蛟龍赤螭鰕鰭漸離鰕鰔鰕鰔鰕鰔鰕鰔鰕鰔鰕鰔
鰕鰔鰕鰔鰕鰔鰕鰔鰕鰔鰕鰔鰕鰔鰕鰔鰕鰔鰕鰔鰕鰔鰕鰔

振鱗奮翼潛處乎深巖魚鼈謹聲萬物衆夥明月珠子
的皪江靡蜀石黃磧水玉磊砢磷磷爛爛采色滢汗叢
積于其中鴻鵠鵠鴛鴦屬玉交精旋目煩驚庸渠歲
疵鴉盧羣浮乎其上汎淫泛濫隨風澹淡與波搖蕩掩
薄水渚唼喋菁藻咀嚼菱藕於是乎崇山矗矗寵嵒崔
嵬深林巨木嶄巖窅窅九峻截薛南山峩峩巖陀顛錡
摧萎崛崎振溪通谷蹇產溝瀆谿呀豁閉阜陵別鵠歲
鬼裊鹿丘虛堀礪隱轉鬱堙登降陀靡陂池驛豸沈溶

淫鬻散渙夷陸亭臯千里靡不被築掩以綠蕙被以江
蘿揉以薜蘿雜以菑夷布結縷櫝戾莎摺車蘅蘭橐本
射干此薑蘘荷歲橙若蓀鮮支黃礫蔣芋青蘋布蒨闕
澤延蔓太原麗靡廣衍應風披靡吐芳揚烈郁郁菲菲
衆香發越盱蠻布寫晻葳叅葑於是乎周覽泛觀縝紛
軋芴芒芒恍忽視之無端察之無涯日出東沼入乎西
陂其南則隆冬生長涌水躍波其獸則獮旄貍聲沈牛
麋麋赤首園題窮奇象犀其北則盛夏含凍裂地涉冰

揭河其獸則麒麟角端駒駼橐駝蛩蛩驪騏驎驢騾
於是乎離宮別館彌山跨谷高廊四注重坐曲閣華棖
壁璫輦道纚屬步櫚周流長途中宿夷峻築堂壘臺增
成巖突洞房俯查眇而無見仰攀櫺而捫天奔星更於
閨闔宛虹拖於楹軒青龍蚺蟺於東廂象輿婉僊於西
清靈固燕於閒館倜傥之倫暴於南榮醴泉涌於清室
通川過於中庭盤石振崖欽巖倚傾嵯峨嶕嶭刻削崢
嶸玫瑰碧琳珊瑚叢生璚玉旁唐珎幽文鱗赤瑕駁瑩

雜挿其間鼉采琬琰和氏出焉於是乎盧橘夏熟黃甘
橙棗枇杷樵柿柰厚朴栲櫟楊梅櫻桃蒲萄隱夫蕢
棗荅還離支羅乎後宮列乎北園馳丘陵下平原揚翠
葉抗紫莖發紅華垂朱榮煌煌扈扈照曜鉅野沙棠櫟
檣華楓枰櫨留落胥邪仁頻并閭欂檀木蘭豫章女貞
長干偃大連抱夸條直暢寔葉後櫨攢立業倚連卷櫨
俛崔錯爰翫坑衡開阿垂條扶疎落英幡纚紛溶箭蓼
猗柅從風瀏莅卉歛蓋象金石之聲管籥之音傑池此

虎旋還乎後宮雜襲累集被山緣谷循坂下隰視之無
端究之無窮於是玄猿素雌雄獫狁飛蠋蛭蝮蠹獠獠胡
穀蛭棲息乎其間長嘯哀鳴翩幡互經夭矯枝格偃蹇
杪顛踰絕梁騰殊榛捷垂條蹕希間牢落陸離爛漫遠
遷若此輩者數百千處娛遊往來宮宿館舍庖厨不徙
後宮不移百官備具於是乎背秋涉冬天子校獵乘鏤
象六玉虬拖蜺旌靡雲旗前皮軒後道遊孫叔奉轡衛
公參乘扈從橫行出乎四校之中鼓嚴簿縱獵者江河

為陸秦山為櫓車騎雷起殷天動地先後陸離離散別
追淫淫裔綠陵流澤雲布雨施生貌豹搏豺狼手熊
羆足野羊蒙鷗蘇縉白虎被斑文跨野馬凌三峻之危
下磧歷之坻徑峻赴險越壑厲水椎飛廉弄獬豸格蝦
蛤鋌猛氏縞腰裹射封豕箭不苟害解脰陷腦弓不虛
發應聲而倒於是乎乘輿弭節徘徊翱翔往來睨部曲
之進退覽將帥之變態然後侵淫促節倏復遠去流離
輕禽蹙履狡獸轉白鹿捷狡兔軼赤電遺光耀追怪物

出宇宙彎蕃弱滿白羽射遊臬櫟蜚遽擇肉而後發先
中而命處弦矢分藝殪什然後揚節而上浮凌驚風歷
駭焱乘虛無與神俱躡玄鶴亂昆鷄道孔鸞促鷄鷄拂
翳鳥捎鳳皇捷鵝雛掩焦朋道盡塗殫廻車而還招搖
乎襄羊降集乎北紘率乎直指晦乎反鄉歷石闕歷封
巒過鳩鵲望露寒下棠梨息宜春西馳宣曲濯鷄牛首
登龍臺掩細柳觀士大夫之勤畧鈞獵者之所得獲觀
徒車之所輔轢步騎之所蹂躪人民之所蹈藉與其窮

極蹠刼驚憚讐伏不被創必怖而死者他他藉藉填阡
滿谷揜乎彌澤於是乎游戲懈怠置酒乎顓天之臺張
樂乎膠葛之寓撞千石之鐘立萬石之虛建翠華之旗
樹靈鼉之鼓奏陶唐氏之舞聽葛天氏之歌千人唱萬
人和山陵為之震動川谷為之蕩波巴俞宋蔡淮南干
遮文成顛歌族居遮奏金鼓迭起鏗鎗闐鞀洞心駭耳
荆吳鄭衛之聲韶濩武象之樂陰淫案衍之音鄢郢繽
紛激楚結風俳優侏儒狄鞮之唱所以娛耳目樂心意

者麗靡爛漫於前靡曼美色於後若夫青琴宓妃之徒
絕殊離俗妖冶閑都靚莊刻飾便嫋綽約柔橈嫚嫚嫵
媚纖弱曳獨繭之褕袿眇閭易以戍削便嫺嫺與世
殊服芬芳漚鬱酷烈淑郁皓齒粲爛宜笑的皦長眉連
娟微睇絲藐色授魂與心愉於側於是酒中樂酣天子
芒然而思似若有亡曰嗟乎此太奢侈朕以覽聽餘閒
無事棄日順天道以殺伐時休息於此恐後世靡麗遂
往而不返非所以為繼嗣創業垂統也於是乎乃解酒

罷獵而命有司曰地可墾闢悉為農郊以贍氓隸墮墻
填塹使山澤之人得至焉實陂池而勿禁虛宮館而勿
侈發倉廩以救貧窮補不足恤鰥寡存孤獨出德號省
刑罰改制度易服色革正朔與天下為始於是歷吉日
以齋戒襲朝服乘法駕建華旗鳴玉鸞游乎六藝之園
馳騫乎仁義之塗覽觀春秋之林射隼首兼騶虞弋玄
鶴舞干戚載雲罕掩羣雅悲伐檀樂樂胥修容乎禮園
翱翔乎書圃述易道於怪獸登明堂坐清廟次羣臣奏

得失四海之內靡不受獲於斯之時天下大說向風而聽隨流而化焄然興道而遷義刑錯而不用德隆於三皇而功羨於五帝若此故獵乃可喜也若夫終日馳騁勞神苦形疲車馬之用抗士卒之精費府庫之財而無德厚之恩務在獨樂不顧衆庶忘國家之政貪雉兔之獲則仁者不由也從此觀之齊楚之事豈不哀哉地方不過千里而囿居九百是草木不得墾闢而民無所食也夫以諸侯之細而樂萬乘之所侈僕恐百姓被其尤

也於是二子愀然改容逡巡避席曰鄙人固陋不知忌諱乃今日見教謹受命矣

大人賦

世有大人兮在於中州宅彌萬里兮曾不足以少留悲世俗之迫隘兮竭輕舉而遠遊乘絳幡之素蜺兮載雲氣而上浮建格澤之長竿兮總光耀之采旄垂旬始以招為慘兮世慧星而為鬐掉指橋以偃蹇兮又旖旎以招搖攬欂櫨以為旌兮靡屈虹而為綢紅杳渺以眩暈兮

焱風涌而雲浮駕應龍象輿之螭畧逶麗兮驟赤螭青
蚪之蚺蜺蜿蜒低卬天矯据以嶠驚兮詘折隆窮螭以
連卷沛艾赴螭仡以佻儗兮放散畔驤以孱顏踉蹌
輶轄容以委麗兮綢繆偃蹇怵臯以梁倚糾蓼呌莽躡
以般路兮蔑蒙踴躍騰而狂趯莅颯卉翕燁至電過兮
煥然霧除霍然雲消邪絕少陽而登太陰兮與真人乎
相求互折窈窕以右轉兮橫厲飛泉以正東悉徵靈園
而選之兮部乘衆神於瑤光使五帝先導兮反太一而

從陵陽左玄冥而右黔雷兮前陸離而後滄溟
所征伯僑而役羨門兮屬岐伯使尚方祝融驚而蹕御兮清霧
氣而後行屯余車其萬乘兮絳雲蓋而樹華旗使勾芒
其將行兮吾欲往乎南娛歷唐堯於崇山兮過虞舜於
九疑紛湛湛其差錯兮雜還膠葛以方馳騷擾銜蓂其
相紛拏兮滂溟泱軋灑以林離鑢羅列聚叢以龍茸兮
衍曼流爛瘳以陸離徑入雷室之硤磷鬱律兮洞出鬼
谷之崑崙嵬礧徧覽八紘而觀四荒兮竭渡九江而越

五河經營炎火而浮弱水兮杭絕浮渚而涉流沙奄息
總極汜濫水嬉兮使靈媧鼓瑟而舞馮夷時若夢夢將
混濁兮召屏翳誅風伯而刑雨師西望崑崙之輶沕沕
忽兮直徑馳乎三危排閭闔而入帝宮兮載玉女而與
之歸舒閭風而搖集兮亢烏騰而一止低徊陰山翔以
紆曲兮吾乃今日睹西王母矐然白首戴勝而穴處兮
亦幸有三足鳥為之使必長生若此而不死兮雖濟萬
世不足以喜回車竭來兮絕道不周會食幽都呼吸沆

溼殮朝霞兮嘒咀芝英兮噉瓊華媿侵潯而高縱兮紛
鴻涌而上厲貫列缺之倒景兮涉豐隆之滂沛馳遊道
而修降兮驚遺霧而遠逝迫區中之隘陝兮舒節出乎
北垠遺屯騎於玄闕兮軼先驅於寒門下崢嶸而無地
兮上寥廓而無天視眩眠而無見兮聽恍恍而無聞乘
虛無而上假兮超無友而獨存

長門賦

孝武皇帝陳皇后時得幸頗妬別在長門宮愁悶

悲思聞蜀郡成都司馬相如天下工為文奉黃金
百斤為相如文君取酒因于解悲愁之辭而相如為
文以悟主上陳皇后復得親幸其辭曰

夫何一佳人兮步逍遙以自虞魂踰佚而不反兮形枯
槁而獨居言我朝往而暮來兮飲食樂而忘人心嫌移
而不省故兮交得意而相親伊予志之慢愚兮懷真慙
之懽心願賜問而自進兮得尚君之玉音奉虛言而望
誠兮期城南之離宮修薄具而自設兮君曾不肯乎幸

臨廓獨潛而專精兮天飄飄而疾風登蘭臺而遙望兮
神怳怳而外淫浮雲鬱而四塞兮天窈窕而晝陰雷殷
殷而響起兮聲象君之車音颼風迴而赴閨兮舉帷幄
之檐檐桂樹交而相紛兮芳酷烈之閭閭孔雀集而相
存兮玄猿嘯而長吟翡翠脅翼而來萃兮鸞鳳翔而北
南心憑噫而不舒兮邪氣壯而攻中下蘭臺而周覽兮
步從容於深宮正殿塊以造天兮鬱並起而穹崇間徙
倚於東廂兮觀夫靡靡而無窮擠玉戶以撼金鋪兮聲

噌吰而似鐘音刻木蘭以為櫟兮飾文杏以為梁羅丰
茸之游樹兮離樓梧而相撐施瑰木之構櫨兮委參差
以棟梁時彷彿以物類兮象積石之將將五色炫以相
曜兮爛耀耀而成光綴錯石之瓊甍兮象瑤瑁之文章
張羅綺之幔帷兮垂楚組之連綢撫柱楣以從容兮覽
曲臺之央央白鶴噉以哀號兮孤雌跼於枯楊日黃昏
而望絕兮悵獨託於空堂懸明月以自照兮徂清夜於
洞房援雅琴以變調兮奏愁思之不可長按流徵以却

轉兮聲幼妙而復揚貫歷覽其中操兮意慷慨而自抑
左右悲而垂淚兮涕流離而從橫舒息悵而增歎兮蹠
履起而彷徨揄長袂以自翳兮數昔日之讐殃無面目
之可顯兮遂頽思而就牀持芬若以為枕兮席荃蘭而
蒹香忽寢寐而夢想兮魂若君之在旁惕寤覺而無見
兮魂迢迢若有亡衆鷄鳴而愁予兮起視月之精光觀
衆星之行列兮畢昴出於東方望中庭之藹藹兮若季
秋之降霜夜曼曼其若歲兮懷鬱鬱其不可再更澹偃

塞而待曙兮荒亭亭而復明妾人竊自悲兮究年歲而不敢忘

美人賦

司馬相如美麗閑都遊於梁王梁王說之鄒陽譖之於王曰相如美則美矣然服色容冶妖麗不忠將欲媚辭取悅遊王後宮王不察之乎王問相如曰子好色乎相如曰臣不好色也王曰子不好色何若孔墨乎相如曰古之避色孔墨之徒聞齊饋女而遐逝望朝歌而迴車

譬猶防水火中避溺山隅此乃未見其可欲何以明不好
色乎若臣者少長西土鰥處獨居室宇遼廓莫與為
娛臣之東隣有一女子雲髮豐艷蛾眉皓齒顏盛色茂
景曜光起恒翹翹而西顧欲留臣而共止登垣而望臣
三年於茲矣臣棄而不許竊慕大王之高義命駕東來
途出鄭衛道由桑中朝發溱洧暮宿上宮上宮間館寂
寞雲虛門閣晝掩暖若神居臣排其戶而造其堂芳香
芬烈黼帳高張有女獨處婉然在牀奇葩逸麗淑質艷

光親臣遷延微笑而言曰上客何國之公子所從來無
乃遠乎遂設旨酒進鳴琴臣遂撫琴為幽蘭白雪之曲
女歌曰曰獨處室兮廓無依思佳人兮情傷悲有美人
兮來何遲日既暮兮華色衰敢託身兮張自私玉釵挂
臣冠羅袖拂臣衣時日西夕玄陰晦冥流風慘冽素雪
飄零閒房寂謐不聞人聲於是寢具既設服玩珍奇金
鉅薰香黼帳低垂裯褥重陳角枕橫施女乃弛其上服
表其褰衣皓體呈露弱骨豐肌時來親臣柔滑如脂臣

乃脉定於內心正於懷信誓旦旦秉志不回翻然高舉
與彼長辭

哀二世賦

登陂陲之長阪兮坐入曾宮之嵯峨臨曲江之墮州兮
望南山之參差巖巖深山之磴磴兮通谷蹻乎矜訝汨
滅喻習以永逝兮注平臯之廣衍觀衆樹之蓊夢兮覽
竹林之榛榛東馳土山兮北揭石瀨弭節容與兮歷弔
二世持身不謹兮亡國失執信讒不寤兮宗廟滅絕鳴

呼哀哉操行之不得兮墓蕪穢而不修兮魂亡歸而不
食夏邈絕而不齊兮彌久遠而愈休精罔闐而飛揚兮
拾九天而永逝嗚呼哀哉

書

諫獵書

臣聞物有同類而殊能者故力稱烏獲捷言慶忌勇期
賁育臣之愚竊以為人誠有之獸亦宜然今陛下好陵
阻險射猛獸卒然遇軼材之獸駭不存之地犯屬車之

清塵輿不及還轅人不暇施巧雖有烏獲逢蒙之伎
力不得用枯木朽株盡為害矣是胡越起於轂下而
羗夷接軫也豈不殆哉雖萬全無患然本非天子之
所宜近也且夫清道而後行中路而後馳猶時有銜
檠之變而况陟乎蓬蒿馳乎丘墳前有利獸之樂而
內無存變之意其為禍也不亦難矣夫輕萬乘之重
不以為安而樂出於萬有一危之塗以為娛臣竊為
陛下不取也蓋明者遠見於未萌而智者避危於未

金史紀事本末卷二
形禍固多藏於隱微而發於人之所忽者也故鄙諺曰
家累千金坐不垂堂此言雖小可以喻大臣願陛下之
留意幸察

報卓文君書

五味雖甘寧先稻黍五色有燦而不掩韋布惟此綠衣
將執子之釜錦水有鴛漢宮有木誦子嘉吟而回予故
步當不令負丹青感白頭也

檄

諭巴蜀父老檄

告巴蜀太守蠻夷自擅不討之日久矣時侵犯邊境勞
士大夫陛下即位存撫天下輯安中國然後興師出兵
北征匈奴單于怖駭交臂受事屈膝請和康居西域重
譯納貢稽首來享移師東指閩越相誅右弔番禺太子
入朝南夷之君西楚之長常效貢職不敢怠惰延頸舉
踵喁喁然皆鄉風慕義欲為臣妾道里遼遠山川阻深
不能自致夫不善者已誅而為善者未賞故遣中郎將

往賓之發已蜀之士各五百人以奉幣衛使者不然靡
有兵革之事戰鬪之患今聞其乃發軍興制驚懼子弟
憂患長老郡又擅為轉粟運輸皆非陛下之意也當行
者或亡逃自賊殺亦非人臣之節也夫邊郡之士聞烽
舉燧燔皆攝弓而馳荷兵而走流汗相屬惟恐居後觸
白刃冒流矢議不反顧計不旋踵人懷怒心如報私讐
彼豈樂死惡生非編列之民而與已蜀異主哉計深慮
遠急國家之難而樂盡人臣之道也故有剖符之封析

圭而爵位為通侯居列東第終則遺顯號於後世傳土
地於子孫行事甚忠敬居位甚安佚名聲施於無窮功
烈著而不滅是以賢人君子肝腦塗中原膏液潤野草
而不辭也今奉幣役至夷夷即自賊殺或亡逃抵誅身
死無名謚為至愚恥及父母為天下笑人之度量相越
豈不遠哉然此非獨行者之事也父兄之教不先子弟
之率不謹也寡廉鮮恥而俗不長厚也其被刑戮不亦
宜乎陛下患使者有司之若彼悼不肖愚民之如此故

遣信使曉諭百家以發卒之事因數之以不忠死亡之
罪讓三老孝弟以不教誨之過方今田時重煩百姓已
親見近縣恐遠所谿谷山澤之民不徧聞檄到亟下縣
道使咸知陛下之意唯毋忽也

難

難蜀父老文

漢興七十有八載德茂存乎六世威武紛紜湛恩汪濊
羣生澍濡洋溢乎方外於是乃命使西征隨流而攘風

之所被罔不披靡因朝冉從駢定祚存邛畧斯揄舉苞
蒲結軌還轅東鄉將報至於蜀都耆老大夫縉紳先生
之徒二十有七人儼然造焉辭畢進曰蓋聞天子之於
夷狄也其義羈縻勿絕而已今罷三郡之士通夜郎之
塗三年於茲而功不竟士卒勞倦萬民不贍今又接之
以西夷百姓力屈恐不能卒業此亦使者之累也竊為
左右患之且夫邛笮西越之與中國並也歷年滋多不
可記已仁者不以德來强者不以力并意者其殆不可

乎今割齊民以附夷狄弊所恃以事無用鄙人固陋不
識所謂使者曰烏謂此乎必若所云則是蜀不變服而
已不化俗也僕尚惡聞若說然斯事體大固非觀者之
所觀也余之行急其詳不可得聞已請為大夫粗陳其
畧蓋世必有非常之人然後有非常之事有非常之事然
後有非常之功非常者固常人之所異也故曰非常之
原黎民懼焉及臻厥成天下晏如也昔者洪水沸出
汜濫行溢民人升降移徙崎嶇而不安夏后氏感之乃

堙洪塞源決江疏河灑沉澹菑東歸之於海而天下永
寧當斯之勤豈惟民哉心煩於慮而身親其勞躬儼駢
胝無肢膚不生毛故休烈顯乎無窮聲稱決乎于茲且
夫賢君之踐位也豈特委瑣喔蹢拘文牽俗循誦習傳
當世取說云爾哉必將崇論閎議創業垂統為萬世規
故馳騫乎兼容并包而勤思乎參天貳地且詩不云乎
普天之下莫非王土率土之濱莫非王臣是以六合之
內八方之外浸潯衍溢懷生之物有不浸潤於澤者賢

君恥之今封疆之內冠帶之倫咸獲嘉祉靡有闕遺矣
而夷狄殊俗之國遠絕異黨之域舟車不通人跡罕至
政教未加流風猶微內之則犯義侵禮於邊境外之則
邪行橫作放殺其上君臣易位尊卑失序父兄不辜幼
孤為奴虜係縲號泣內鄉而怨曰蓋聞中國有至仁焉
德洋恩普物靡不得其所今獨曷為遺已舉踵思慕若
枯旱之望雨盤夫為之垂涕沉乎上聖又烏能已故北
出師以討強胡南馳使以誚勁越四面風德二方之君

鱗集仰流願得受號者以億計故乃闢沫若微梓犸鏤
靈山梁繇原創道德之塗垂仁義之統將博恩廣施遠
撫長駕使䟽邈不閉習爽闇昧得耀乎光明以偃甲兵
於此而息討伐於彼遐邇一體中外禔福不亦康乎夫
拯民於沉溺奉至尊之休德反衰世之陵夷繼周氏之
絕業天子之急務也百姓雖勞又烏可以已哉且夫王
者固未有不始於憂勤而終於佚樂者也然則受命之
符合在於此方將增太山之封加梁父之事鳴和鸞揚

樂頌上咸五下登三觀者未覩指聽者未聞音猶鷦鷯
已翔乎寥廓而羅者猶視乎藪澤悲夫於是諸大夫茫
然喪其所懷來而失厥所以進喟然並稱曰允哉漢德
此鄙人所願聞也百姓雖勞請以身先之敝罔靡徙遷
延而辭退

符命

封禪文

伊上古之初肇自昊穹兮生民歷撰列辟以迄於秦率

邇者踵武迅聽者風聲紛綸歲蕤堙滅而不稱者不可
勝數也續昭夏崇號謚畧可道者七十有二君罔若淑
而不昌疇逆失而能存軒轅之前遐哉邈乎其詳不可
得聞已五三六經載籍之傳維見可觀也書曰元首明
哉股肱良哉因斯以談君莫盛於唐堯臣莫賢於后稷
后稷創業於唐公劉發迹於西戎文王改制爰周鄧隆
大行越成而後陵夷衰微千載無聲豈不善始善終哉
然無異端慎所由於前謹遺教於後耳故軌迹夷易易

導也湛恩濛涌易豐也憲度著明易則也垂統理順易
繼也是以業隆於緼縠而崇冠於二后揆厥所元終都
攸卒未有殊尤絕迹可考於今者也然猶躡梁父登泰
山建顯號施尊名大漢之德漢涌原泉湧湑漫衍旁魄
四塞雲專霧散上暢九垓下泝八埏懷生之類霑濡浸
潤協氣橫流武節飄逝邁陞游原迥濶泳沫首惡湮沒
闇昧昭哲昆蟲凱澤回首面內然後囿騶虞之珍羣徵
康鹿之怪獸藻一莖六穗於庖犧雙貉共抵之獸獲周

餘放龜於岐招翠黃乘龍於沼鬼神接靈囿賓於間館
奇物譎詭倣儻窮變欽哉符瑞臻至猶以為德薄不敢
道封禪蓋周躍魚隕航休之以燎徹夫斯之為符也以
登介丘不亦慙乎進讓之道其何與於是大司馬進
曰陛下仁育羣生義征不愾諸夏樂貢百蠻執贄德侔
往初功無與二休烈浹洽符瑞衆變期應紹至不待創
見意者泰山梁父設壇場望幸蓋號以況榮上帝垂恩
儲社將以薦成陛下謙讓而弗發也挈三神之驪缺王

道之儀羣生惡焉或謂且天為質闇示珍符固不可辭
若然辭之是泰山靡記而梁父靡幾也亦各並時而榮
成濟厥世而屈說者尚何稱於後而云七十二君乎夫
修德以錫符奉符以行事不為進越故聖王勿替而修
禮地祇謁款天神勒功中嶽以彰至尊舒盛德發榮號
受厚福以浸黎民也皇皇哉斯事天下之壯觀王者之
丕業不可貶也願陛下全之而後因雜薦紳先生之畧
術使獲耀日月之末光絕災以展采錯事猶兼正列其

義被飭厥文作春秋一藝將襲舊六為七攄之無窮俾
萬世得激清流揚微波蜚英聲騰茂實前聖之所以永保
鴻名而常為稱首者用此宜命掌故悉奏其義而覽
焉於是天子沛然改容曰愉乎朕其試哉乃遷思回慮
總公卿之義詢封禪之事詩大澤之博廣符瑞之富乃
作頌曰自我天覆雲之油油甘露時雨厥壤可遊滋液
滲漉何生不育嘉穀六穗我穡曷蓄非唯雨之又潤澤
之非唯濡之汜專濩之萬物熙熙懷而慕思名山顯位

望君之來君乎君乎侯不邁哉般般之歡樂我君罔白
質黑章其儀可嘉旼旼睦睦君子之能蓋聞其聲今觀
其來厥塗靡蹤天瑞之徵茲亦於舜虞氏以興濯濯之
麟遊彼靈時孟冬十月君徂郊祀馳我君輿帝以享祉
三代之前蓋未嘗有宛宛黃龍興德而升采色炫耀爙
炳輝煌正陽顯見覺寤黎烝於傳載之云受命所乘厥
之有章不必諄諄依類託寓諭以封璽披藝觀之天人
之際已交上下相發允答聖王之德兢兢翼翼也故曰

興必慮衰安必思危是以湯武至尊嚴不失肅祕舜在假典顧省厥遺此之謂也

傳

自叙傳

司馬相如者蜀郡成都人也字長卿少時好讀書學擊劍故其親名之曰犬子相如既學慕蘭相如之為人更名相如以貴為郎事孝景帝為武騎常侍非其好也會景帝不好辭賦是時梁孝王來朝從遊說之士齊人鄒

陽淮陰枚乘吳莊忌夫子之徒相如見而說之因病免
客遊梁梁孝王令與諸生同舍相如得與諸生遊士居
數歲乃著子虛之賦會梁孝王卒相如歸而家貧無以
自業素與臨邛令王吉相善吉曰長卿久宦遊不遂而
來過我於是相如往舍都亭臨邛令繆為恭敬日往朝
相如相如初尚見之後稱病使從者謝吉吉愈益謹肅
臨邛中多富人而卓王孫家僮八百人程鄭亦數百人
二人乃相謂曰今有貴客為具召之并召令令既至卓

氏客以百數至日中謂司馬長卿長卿謝病不能往臨
卽令不敢嘗食自往迎相如相如不得已彊往一坐盡
傾酒酣臨卽令前奏琴曰竊聞長卿好之願以自娛相
如辭謝為鼓一再行是時卓王孫有女文君新寡好音
故相如繆與令相重而以琴心挑之相如之臨卽從車
騎雍容間雅甚都及飲卓氏弄琴文君竊從戶窺之心
說而好之恐不得當也既罷相如乃使人重賜文君侍
者通殷勤文君夜亡奔相如相如乃與馳歸家居徒四

壁立卓王孫大怒曰女至不材我不忍殺不分一錢也
人或謂王孫王孫終不聽文君久之不樂曰長卿第俱
如臨邛從昆弟假貸猶足為生何至自苦如此相如與
俱之臨邛盡賣其車騎買一酒舍酤酒而令文君當鑪
相如身自著犢鼻褌與保庸雜作滌器於市中卓王孫
聞而恥之為杜門不出昆弟諸公更謂王孫曰有一男
兩女所不足者非財也今文君已失身於司馬長卿長
卿故倦遊雖貧其人材足依也且又令客獨奈何相辱

如此卓王孫不得已分與文君僮百人錢百萬及其嫁時衣被財物文君乃與相如歸成都買田宅為富人居久之蜀人楊得意為狗監侍上上讀子虛賦而善之曰朕獨不得與此人同時哉得意曰臣邑人司馬相如自言為此賦上驚乃召問相如相如曰有是然此乃諸侯之事未足觀也請為天子遊獵賦賦成奏之上許令尚書給筆札相如以子虛賦虛言也為楚稱烏有先生者烏有此事也為齊難無是公者無是人也明天子之義



故空藉此三人為辭以推天子諸侯之苑囿其卒章歸之於節儉因以風諫奏之天子天子大說賦奏天子以為郎無是公言天子上林廣大山谷水泉萬物及子虛言楚雲夢所有甚眾侈靡過其實且非義理所尚故刪取其要歸正道而論之相如為郎數歲會唐蒙使畧通夜郎西焚中發巴蜀吏卒千人郡又多為發轉漕萬餘人用軍興法誅其渠帥巴蜀民大驚恐上聞之乃使相如責唐蒙因諭告巴蜀民以非上意相如還報唐蒙已畧通

夜郎因通西南夷道發巴蜀廣漢卒作者數萬人治道
二歲道不成士卒多物故費以巨萬計蜀民及漢用事
者多言其不便是時邛笮之君長聞南夷與漢通得賞
賜多多欲願為內臣妾請吏比南夷天子問相如相如
曰邛笮冉駹者近蜀道亦易通秦時嘗通為郡縣至漢
興而罷今誠復通為置郡縣愈於南夷天子以為然乃
拜相如為中郎將建節往使副使王然于壺充國呂越
人馳四乘之傳因巴蜀吏幣物以賂西夷至蜀蜀太守

以下郊迎縣令負弩矢先驅蜀人以為寵於是卓王孫臨叩諸公皆因門下獻牛酒以交驩卓王孫喟然而歎自以得使女尚司馬長卿晚而厚分與其女財與男等同司馬長卿便畧定西夷叩笮冉駹斯榆之君皆請為內臣除邊關關益斥西至沫若水南至牂牁為徼通零關道橋孫水以通叩都還報天子天子大說相如使時蜀長老多言通西南夷不為用唯大臣亦以為然相如欲諫業已建之不敢乃著書籍以蜀父老為辭而已詰

難之以風天子且因宣其使指令百姓知天子之意其
後人有上書言相如使時受金失官居歲餘復召為郎
相如口吃而善著書常有消渴疾與卓氏婚饒於財其
進仕宦未嘗肯與公卿國家之事稱病間居不慕官爵
嘗從上至長楊獵是時天子方好自擊熊羆馳逐野獸
相如上疏以諫上善之還過宜春宮相如奏賦以哀二
世行失也拜為孝文園令天子既美子虛之事相如見
上好僊道因曰上林之事未足美也尚有靡者臣嘗為

大人賦未就請具而奏之相如以為列仙之傳居山澤間形容甚臞此非帝王之僊意也乃遂就大人賦天子大說飄飄有凌雲之氣似遊天地之間意相如既病免家居茂陵

劉子玄史通云馬卿為自傳具在其集中子長錄為列傳班氏仍舊曾無改尋固於馬揚傳末皆云遷雄自叙至相如篇下獨無此言蓋止憑太史之書未見文園之集耳余謂此傳果馬卿自作安得有相如已死天子遣所忠索書又安知沒後數歲上始祭后上及禮中岳事乎然則自叙傳應至相如既病免家居茂陵為止此後別有結末惜今不傳而天子曰以下還是太史公補足之近世學士謂相如集中傳乃

校集者取子長所作附之非其自筆然史通序傳一章詳言作者自叙基于騷經降及相如始以自叙為傳史通之意直以後人序傳皆作祖于相如斷非影響而俗儒多以亡奔綠器等事胡不少諱以此為非馬卿筆不知馬卿正自述慢世一段光景委曲周至他人不能代之寫照阿堵中也又按南史云古之名入相如孟堅子長皆自叙風流傳芳末世則言此文之出相如手非一人矣

歌

琴歌二首

鳳兮鳳兮歸故鄉遨遊四海求其凰時未遇兮無所將
何悟今夕兮升斯堂有艷淑女在閨房室邇人遐毒我

腸何緣交頸為鴛鴦胡頔頔兮共翱翔

又

鳳兮鳳兮從我棲得託尊尾永為妃交情通體心和諧
中夜相從知者誰雙翼俱起翻高飛無感我思使余悲



漢魏六朝百三家集卷二